



13. Oktober

UKA 2020/107

Nunatsinni sanaartornikkut suliffeqarfiutilinnut mikisunut angivallaanngittunullu sanaartornikkut aningaasalersuutigullu annertunerusumik akuutitsisinnaanerit pillugu apeqquteqaat aallaavigalugu oqallinnissamik siunnersuut.

(Inatsisartuni ilaasorta, Doris J. Jensen, Siumut)

Oqallisissiatut siunnersuut Inatsisartuni Ilaasortamit Doris J. Jensen-imit saqqummiunneqartoq Partii Naleqqamiit imaattumik oqaaseqarfigissavarput.

Siunnersuuteqartup oqallisissiamini taakkartugai aammalu qanoq iliuuseqarnissamut periarfissatut taakkartugai saqqummiunneqartut ukiuni arlaqalersuni saqqummiussuunneqartarput kissaatigineqarlutik, minerunngitsumik sanaartornermik suliffeqarfiutillit tungaanniit. Ullumikkut Inuiaqatigiit killiffitsinni nunatsinni sanaartornikkut suliffeqarfiuteqarlutik ingerlataqartut nunatsinni najugaqavissut ukiuni kingullerni ikiliartupiloorsimapput, tassami sinerissami illoqarfippassuarni Nuup avataaneersuni sanaartorneq unittuuvitsinneqarsimammat, aatsaallu piffiit ilaanni aallartikkiartuaalerluni.

1980-sikkunni aammaalumi 1990-sikkunni Nunatsinni suliffeqarfiit Nunatsinni najugaqavissut annertusiartorlutik aningaasaqarnikkut nakussakkiartorsimagaluartut suliassaaleqinerup kingunerisaanik unerarlutik nungukkiartuinnarsimapput allaat piffiit ilaanni taamaallaat ataasiakkaannguit kisimik ingerlasinnaalersimallutik. Taamaalilluni ullumikkut sanaartornermik ingerlataqartut ingerlatseqatigiiffissuit avataaneersut Nunatsinni nakussakkaluttuinnartutut inissisimalersimapput, pissutigalugu Nunatsinni Naalakkersuinikkut piumasaqaataasartut annikippalaarujussuarmata, aammalu Namminersorlutik oqartussani Kommuuninilu pisortaniit suliariumannittussarsiuussisarnermi aalajangersaasarnerit Nunatsinni najugaqafisuuneramik pingaatitsisarnissaat pisariqaraluarmat.

Partii Naleqqamiit isumaqarpugut pisariqalersimasoq Nunatta immikkoortuini tamani Nunatsinni najugaqavissut sanaartornermik suliffeqarfiuteqarlutik ingerlataqartut nakussassarneqarnissaat aamma naalakkersuinikkut suliarineqartariqartoq. Pisariaqarpoq nunatsinni najugaqavissunik nunatta inuinik pingaartitsilluni sanaartornikkut ingerlatsilernissarput, taamaaliornikkut aatsaat suliffeqarfiit ataavartut, nunatta inuinik pingaartitillutik sulisoqartut, ilinniartoqarnissamik pingaartitsisut pilersinneqarsinnaammata, ilinniartunummi sungiusarluni suliffissat amigaataaqimmata.

Aamma soorunami pingaaruteqarpoq suliariumannittussarsiuussisarnermi inatsisitigut naleqqussaasoqarnissaa, maannakkut aallartillugu suliarineqalersutut.

Taamannak oqaaseqarluta, oqallisissiamik saqqummiisoq qutsavigaarput.

Pele Broberg, Partii Naleraq